

तुबारि

SAINT TECDHARAM

English medium SCHOOL
ADMISSIONS ARE STARTED. Ph.9418378712
Discipline Smart work Quality education
High qualified teachers with personal care
100% Results in annual exams 2010 with 97% above marks
Our students got first position in Dist Chamba and top
five positions at Pangi block in 5th class annual exams

पं ग वा डि मा सि क प त्रि का

तुबारि संपादकीय टीम

♦ ट्यारे तुबारि पढुवालो! कुछ खास बजहि जे अस मई मेहने संस्करण छपाई न बटे।

♦ अस इ उम्मिद करं लगे से कि एण बाड़े दिन अन्तर सुआ मेहणु इस कम अन्तर सहयोग कते।

♦ इस तुबारि मासिक पत्रिका समाचार पत्र एकट अन्तर रिजिट्रि नेई भो। सिर्फ पांगि घाटि अन्तर पढू जे इ पत्रिका शुरु कियो सि।

♦ तुबारि एक अवाणिज्यिक पत्रिका भो।

♦ तुबारि पत्रिका कोइ मेहणु, जनजाति, त संस्कृति जे गलित कडेण जे नेई छपाण लगे। अगर कोइ ई सोचता बि त अस जिम्मेवार नेई।

♦ छपाणे पेहले सोभ आर्टिकल दुई टाई पांगेइ मेहणु हुरालो असे। इ त खुलि बोक असि कि पेहिल बार पांगवाडि लिखणे सुआ मुशकिल भुन्ति त गलति बि भुन्ति। अगर कोई लिखणे गलति असि त असि जे जरूर बोले। त अस तसे होरे संस्करण पुठ ठीक करणे कोशिश कते।

♦ आर्टिकलस ना मिएल, या घाटि मेहणु के मदद ना मिएल त तुबारि पत्रिका कदि बि बंद भुइ सक्ति।

♦ कोइ चिज छपां सि या नेई छपां जे तुबारि संपादकीय टीमे पुरा अधिकार असा।

♦ अस सोभि पांगि मेहणु जे हात जोड कई निवेदन कते कि, तुस बि कोइ अछा आर्टिकल, पुराणि या नौइ कथा, कहावत, कविता, त नौवे धीत (पांगवाडि अन्तर) लिख कइ छपां जे हेंनदे दिए।

♦ अस किलाड केन्द्रीय पुस्तकालय, त बजार टेके भैड हरिरामे दुकान अन्तर तुबारि ड्रॉप बॉक्स पुठ बि अपु सझाव ओर आर्टिकलस रखुं जे सुविधा कियो असि।

☎ 9418431531

☎ 9418429574

☎ 9418329200


☎ 9418411199

☎ 9418411599

हैं राज - पंचायती राज

पंचायती राज लोकतंत्रे अभिन्न अंग भिन्थ। ए केन्द्र सरकार जुएई हर गां त हर गां जुएई सरकार जोइता। तोउं त सरकार गां सभा त पंचायती राज सुआ महत्व देन्ति। भारते कुछ राज्य अन्तर हिमाचल प्रदेश एक ई राज्य असा जेनकि गां सभाए जे सुआ अधिकार दितो असे।

हिमाचल प्रदेश पंचायती राज एकट, 1994 पुठ लिखो असु कि पंचायती राज टाई परते भुन्ति जीं कि गां पंचायत पेहलि परत, पंचायत समिति दोकि परत, त जिला परिषद टेकि परत। हैं राज्य अन्तर अभेई 3243 गां पंचायत, 75 पंचायत समिति त 12 जिला परिषद असे। पंचायती चुनाव (हिमाचल प्रदेश पंचायती राज एकट, 1994) इस मेहने पांगी घाटी अन्तर 16 गां पंचायती, लाहुल स्पिति अन्तर 28 पंचायती अन्तर चुनाव भुण लगे से। सोभ मिआई कई 44 पंचायती चुनाव इस मेहने अन्तर भुण लगे से।



हैं राज - पंचायती राज

गां, देशे रीडे हल्लोटा भो। गांए बोलि देशे सुहिलयत भुन्ति। तोउं त हर गां पंचायति अन्तर बड़िया नेता भुण जरूरी असा। इस चुनावे मौके पुठ अईए अस सोभ मीं कई ई नेता चुणते जेकि गांए सुहिलयते कम कता न कि अपु फाइदे कम कता।

रोभ न करुण

मत्ते रोज पेहले, एक मेहणु भुन्ताथ। से सुआ रोभ कताथ। मतलब कि से जेहिन बि मेताथ तेहिन जे बोताथ कि ,मैंइ ई कीउ, मैंइ ओ बि कीउ। दुनिया अन्तर “ई कोई कम नेई जेस अउं न कइ बटता”। चाहें से गांओठ भोल या टजोठ भोल से केसे हेर ना डरतथ। तेठि बि से बजरता रेहन्तथ। सोबि मेहणु के कन पकान्तथ अपु बोकि जुओई। से सोचतथ कि सोब मेहणु मोउ मनते। पर तेस गां मेहणु बचारे परशान भुई कई सोचतेथ कि इस मेहणु केआं गां कीं छुड़ाण।

त एक लिंग एक स्याणि जिल्हाणु तस केई अई त से फि अपु बोक लाण लगा। तेन जिल्हाणु पेहले चुपचप शुणु त पता बोति “तोउ अपफ पुठ सुआ रोभ असा। तु बोता कि तु सोब कइ सकता। अउं एक बोक लांति। हेरि तु कई बटता ना”? से बोता, “किस ना कइ सकता। जरूर कइ सकता”। त से जिल्हाणु तेस कियां सोह करवान्ति त बोति “ हेरि, जेठि दीस डुबतु, तु तेठि पूजि बटता ना”? से मेहणु दिस हेरता त अपु मन अन्तर सोचता कि ओ यारा ए त कोई दुई टाई घन्टे बथ असि। त ए जिल्हाणु कि सोच कइ मोउ जे बोलुण लगे सि। फि से बोता कि “ठीक सि, अउं घेई सकता। तु मोउं जे कि रोभ लान्ति?” त से जिल्हाणु बोति “सोह कर कि अगर तु पूजि ना बटियेल त मोउ अपु शकल न हेरालिण। त से मेहणु लेहर किदि कइ तेस जिल्हाणु जे बि बोता “अउं त जरूर पूजता तठि। पर जपल अउं पैठता त तोउ अपु शकल ना हेरालिण, इस गां । गा त अपु समान जुद्धेरी दे।” तोउं से झठ पार जे घेण लगा जेठ दीस ओलुण लगे थिउ।

से गा त गोठ केआं बि खड़िया घेई गा। जपल से तेस चोटि पुठ पुजा त तेन हेरु कि दीस तठि नेई पर अगिरि चोटि पुठ ओलुण लगो सु। त से दौड़ि कई होरि चोटि पुठ पुजा। जपल सौंख से तेठि पुजा त तेस केउ कि दिस लगो सु ओलुण तठिआ अगिरि चोटि पुठ। तपल अन्हारु बि भूण लग गोओ थीउ। त से बि हंठ-हंठ कइ बख भोई गोओ थिआ, हान्ट हान्ट कई। त तठि घोड़ पुठ बिश कइ सोचु लगा कि शुइ जरुर पुजता तेस चोटि पुठ। तोउं हरालता दीस मोउ कतु दौड़ान्तु हेरि। से राति तठि उंघ गा। त भ्यागे भ्यागे घेण लगा होरि चोटि पुठ जे। पर जपल से तेठि पुजा त दीस अगिरि चोटि पुठ ओलुण लगो थिउ। त से ई कइ कइ सोभ फाठ त चोटि कियां पार घेइ गा। जपल सुआ रोज भोई गे त फाठ बि मठणीं लगे त सुआ पद्धर केंण लगे। अब त दिस बि सुआ दुर केंण लगु। तिखेई तेस मेहणु बि पता लगण लगा कि से केदि बि जेठ दिस डुबतु तठ पुज ना बटता।

हान्टते हान्टते से यक ग्रां पुजा त तठि बिश कइ सोचुं लगा कि से स्याणि जिल्हाणु मोउ कीं फसाई कई अपु ग्रां केआं अतु दूर लंघाई गई। तेस बिचारे अफसोस भूआ कि से रोभ अन्तर अत कांणि गोओ थिया कि तस अत् बि पता न लगा कि दीस केदि बि जिमि पुठ ओलतु नउं। तोउं तसे रोभ सोब मुख गा। पर से कदि बि अपु ग्रां न आ। पता से तेस ग्रां बिठा त सोब मेहणु जोई सुसर बिशा।

कुछ खास खबर

- ◆ इस मेहने 10 त 12 तरीख पाँगी घाटी 16 ग्रां पंचायती अन्तर चुनाव भुण लगो से।
- ◆ कलाइ होंसुणे देहर वठ मई 29 तरीख नोवां नियोखर चाढा त इस मेहने चौकी देहर बी नौवां नियोखर चढ्हण असा।
- ◆ रोहतांग पास खुलि गो असु त मनाडि जे गाडि चलण लगो असि।
- ◆

नेता, यक स्याणि जिलाहणु जे.....

By Shubham



ADVERTISEMENT/ BEST WISHES FOR MARRIAGES, BITHDAYS, RETIREMENTS Etc. Please ☎ 9418429574

मनिश राणे शुरु किओ सा

LONELY PLANET RESTAURANT

AND HAWK HEIGH ADVENTURE

Beside CHC lab, Killar, Pangi ☎ 9418804701; 9418239677.

Our specialties:- Three room chambered restaurant for official parties, families, and privacy. Tasty, fresh and hygienic food is served. Specialized in Chinese and Kashmiri dishes. Maize roti, mutton sigroo and other local tasty dishes are also available.

We manage Trekking, Hiking, skiing, camping and company tours for tourists. Introducing CAKES and PIZZAS soon. We undertake catering and party orders.